



Opuscula



Opuscula



65  
ÆCUMENICUM  
ECCLESIAE VNIVERSALIS  
CONCILIUM  
ANGELICUS DOCTOR ECCLESIAE

D. THOMAS  
AQUINAS,

*In Octava Anniversaria Suae Celebritatis,*  
Penes Theologicam publicam Disputationem Scholastico-Dogmatica-  
rum Thesium Defensionem, Oratoria Panegyri

DECLARATUS  
ET  
PROMULGATUS.

*In peculiaris Tesseram Affectus & Obligationis*  
PERILLUSTRI & REVERENDISSIMO  
DOMINO

D. JOSEPHO  
CAROLO  
à BŁESZNO

BŁESZYŃSKI.

Ecclesiarum Cathedralis Cracoviensis, & Insignis Collegiatae Tando-  
miriensis CANONICO, OFFICIALI Kielecensi, Præposito in Chro-  
berz & Bolesław, Causarum Consistorij Generalis Cracovi-  
ensis IUDICI Surrogato,

*Inter Annua Divi TUTELARIS sui Solennia*  
*Gratulatorio Voto & Cultu*

PRÆSENTATUS

Per Patrem Hieronymum à Sancto Bernardo Scholarum  
Piarum Sacrae Theologiae Auditorem

ANNO DOMINI 1743.



IN AVITVM DECVS  
PERILLVSTRIS & REVERENDISSIMI  
CANONICI



I.

Excitat Heroes bene nota ad Classica Mayors,  
Et TUA, DOCTORUM DUX amat Arma sequi.  
Integra castra TIBI Lechzi ducat Honoris,  
Agminaq; annorum centuplicata vocet.

II.


Digna cani Virtus Vastum Nomenq; per Orbem,  
Hic se Patritio Stemmata rite notat.  
Clara sat & Cracij hic auditur Fama Trionis,  
Audiet hoc Signo clarior ergo THOMAS.

III.

Ferales Lituos sibi norunt hostica bella,  
TE JUDEX Vitiis Buccina triste canit.  
Terreat Illius Sonus & contraria fata,  
Consonet ut Votis fors studiosa TUIS.



# PERILLUSTRIS REVERENDISSIME DOMINE.



*Angeli Doctoris Panegyrim, quam pro innati erga TE testimonio candoris & voti-  
vi affectus assumpsi caractere, inter festi-  
vas TUO aggratulantium Nomini profer-  
ri permitte voces; Ut cui nuper Scholasticos  
pencs applausus publicis promulgatae ab exe-  
dris, benevolas dedisti aures, eidem quoq; ma-  
num non subtrahas, quam gratius erga me  
nunquam preclusisti. Nec vel minimè paginà hac, ipso natura-  
li jure à me debitam TUIS semper reverentiam jussis, existima  
violari, quibus & aptatam in merita encomia comprimis pennam,  
& obligatissime alias dictioni indicis silentium. Abest procul  
à me, Caelo teste fateor, illud mentis propositum, ut aut in-  
jurius esse videar commendatissime illi TUAE Virtuti, quā*



majori prope, quàm ab alijs appetuntur conatu, in gestis eti-  
am dignissimis novi *TE* evitare laudes, aut debite mihi le-  
ges transgrediens modestie, ubi Angelico Scholæ meæ Do-  
ctori præmissa *TIBI* offero elogia, laudum *TUARUM*  
cum propriæ laudis vitio studeam argumentis. Diem proinde  
Natali *TVO* & Nominalibus illustrem Solenniis, Oratoria  
non collustro Panegyri; Non declaro illud *TIBI* gloriæ  
lumen, quod tam in Domesticis hereditas splendoribus, quam  
ex *TE* Ipso jam per continua bono Patriæ & Ecclesiæ stu-  
dia, jam per propensa erga *TE* Principum Procerumq; Re-  
gni corda, jam per amplissimas Virtutes & merita *TUA* a-  
nimiq; dotes præstantissimas, in totius Domûs & Consanguineo  
junctarum nexu jubar diffundis Familiarum. Unicum hic meæ  
præsentis ad *TE* Orationis est thema, ut & particulare con-  
genitæ mihi erga *TE* propensionis, & commune totius simul  
Religiosæ meæ, è cujus numero sum, Familiæ, *TVO* devotæ  
*NOMINI* & Honori, publico testimonio exprimam Votum;  
quatenus Nominalibus his *TUIS* Festis, Primorum in Ec-  
clesia Divus *INDIGES* Celebritatem adjungat Honorum,  
iisdemq; Manibus, quibus Vitam aluit Mundi, Vite *TUÆ*  
momenta, Cælo ad gloriam, Ecclesiæ ad utilitatem, Patriæ ad sola-  
tium & commodum, propriæ ad decus & ornamentum Domui,  
Religioni meæ ad continuandos favores, seras disponat in ætates

Ita comprecor

PERILLVSTRI REVERENDISSIMO  
*TVO NOMINI,*

Devinctissimus exorator,

Hieronymus à Sancto Bernardo  
Scholarum Piarum Auditor  
Theologiz.





# ORATIO



Satisné jam celeberrimo Doctoris Angelici litatum est honori, quem Studiorum obligatio, Scholarum amor, Ordinum reverentia, integro hucusq; dierum octavario, solemnibus laudum celebravit ritibus? Satisné Præceptori Divinissimo publicis ab exedris devota immolavit oratio, ubi non domestica tantum Inclytæ Dominicanæ Familiæ, etiam extranea tot Academiarum & Ordinum in Panegyres ejus conspiraverunt ingenia? Ergoné tanto Sapientiæ Mari coronando candidissima Dominici in triumphale sertum non satis sunt lilia? ergoné Doctorum Capiti emi-

A

nen-



mentissimo, tot Doctorales Cydares & Laureæ, tot Principes & Pontificiæ Mytræ, tot supremorum in Ecclesia Triregia Caputum è domestico suo non sufficient in coronam Ordine? ut prope universus Orbis cum tot Vniversitatibus & Scholis, vel in unum ejus abiisse videatur Discipulum, vel Panegyristen agere & Oratorem. Ita non immerito, tanta quippe est Aquinatis magni laudum immensitas, tot tantaq; Sanctitatis & Doctrinæ argumenta, ut ijs discendis dicendisq; post Supremæ elogia Cathedræ, ingenia & lingvæ vel disertissimæ non sufficiant. Sæcula decurrunt, Regna & Provinciæ protenduntur in Orbem, in quibus audit THOMAS, plaudit per annos Doctor celebratissimus, tot præconiorum suorum declamatores nactus, quot Sanctioris vitæ Magistros; tot Angelicæ Summæ candidos Discipulos, quot scientiarum principes Professores. Non percenseo celebratas inter Scholasticos commendatissimæ ejus doctrinæ laudes, quas illi post approbationem Divini ipsius è Cruce Verbi: *Bene de me scripsisti THOMAS*, discipulæ ejus undequaq; perorant Scholæ; Orbem obrueret Panegyricis, si auscultaretis mecum, quid in plausum ejus tot Doctissimi Sanctissimiq; circumsonant Ordines, tot proclamant Vniversitates. Audiretis, quid Tolosana, Bononiensis, Patavina, Neapolitana; quid Salmaticensis, Mantuana, Parmensis, Florentina, Barcilonensis; quid Compostellana, Complutensis, Valentiana, Lovaniensis, Duacensis; quid Avenionensem præter, nostramq; Cracoviensem, illam formatricem Regum, Gymnasiorum facile Principem



cipem, Thomisticae veram & juratam sectatricem  
 Sapientiae, totq; alias æquè florentissimas; quid  
 scientificorum illud Seminarium Numinum, illa  
 plurimarum per orbem Universitatum Mater, Pa-  
 risiensis Academia, de Angelico Doctore, publi-  
 co detonet doceatq; è suggestu: **THOMAS**  
*Universalis Ecclesiae lumen præfulgidum, gemma radi-  
 ans Clericorum, Frons Doctorem, Universitatis specu-  
 lum & insigne, claritate vitæ & doctrinæ velut stella  
 refulgens matutina.* Audiretis, quàm augustè Au-  
 gustinianorum, quàm floridè Benedictinorum, quàm  
 elevatè Carmelitarum, fundatè Lateranensium, am-  
 plè & eximiè Minimorum, quàm ponderosè Re-  
 demptionis Captivorum, eruditè Barnabitarum,  
 splendidè Præmonstratensium, divinè Paulitarum,  
 totq; aliorum Sacrorum Ordinum Doctores, Pro-  
 fessorales, Magisteriales, de THOMA, Universa-  
 li suo Doctore, Magistro, Præceptore, in Panegy-  
 res & laudes loquantur, & resonent Cathedræ!  
 quàm doctè solideq; æcumenica illa mundi Scho-  
 la, scientiarum magna Domus, Palæstra Docto-  
 rum, Sacra Societas JESU, in Aquinatis Ma-  
 gisterium Generalibus suis in Comitibus fæderetur,  
 uno conjuret ore & sensu: *Nostri omnino San-*  
*ctum THOMAM ut proprium Doctorem ha-*  
*beant, cumq; in scholastica Theologia sequi teneantur,*  
*nullius enim hoc tempore doctrina potest occurrere, quæ*  
*sit ea solidior, aut securior, ut non immerito Sanctus*  
**THOMAS** *Theologorum Princeps ab omnibus*  
*habeatur.* Minima quoquè Nostra Scholarum Pi-  
 arum Religio, in Scholis & Cathedris Angelico  
 tota quanta addicta & devincta Doctore, illum

4ta Con-  
 gregat:  
 Decreto  
 16. de de-  
 lectu O-  
 pinionum



P. Joseph  
ab An-  
gelo Cu-  
stode Prae-  
positi Gna-  
lis.

Scientiarum suarum & Studiorum, ut unicam quam  
colat & observet Regulam, Supremum Religio-  
nis, præter tot statuta, vel hodie edicit Oraculum:  
*In Theologicis* **MAGISTER** Noster Divus  
**THOMAS** est, si in alicuius verba jurare de-  
bemus, in huius tantum & non alterius. Sed quorsum  
tanta in Divinissimum Aquinatem studia? Vnde  
illi tanta in scholis, Ordinibus, Ecclesia Univer-  
sali ex tot Pontificum assertis, autoritas? Di-  
cetis Magistrum esse Divinarum humanarumque Sci-  
entiarum præstantissimum? parum est; Angelicum,  
& satis, ut vulgo audit, subscribetis Doctorem?  
eximium & rarum prædicatum, sed Aquinati No-  
stro nondum me iudice adæquatum. Plus aliquid  
mihi in eo occurrit suspicandum ad elogia, plus  
vel præsentibus prædicandum ab exedris, nempe,  
non Doctor unus quispiam ille, sed Doctorum o-  
mnium Collegium, & ut concludam verbo:  
**THOMAS** *Æcumenicum Universalis Ecclesie Con-  
cilium.* Hoc ego Ipsum ad ulteriorem Panegy-  
rim dum promulgo titulo, favorabile à Vobis  
Illustrissimi, Sapientissimi, vestrisque majores titu-  
lis AA. expeto & expecto iudicium.

Æcumenici naturam Concilij Oratoria Vestro  
in confesso narrare svada, idem est, ac variegatis so-  
lem effigiare coloribus, syderum olympum accensa  
face demonstrare. Hæc est enim illa Orbi uni-  
verso notissima (affirmante Evangelio) *Lux mun-  
di*, quâ post Supremæ iubar & maiestatem Sedis,  
nil illustrius, splendidiusque habet Ecclesia, ad de-  
clarandum obscurum illud Divinioris lumen Fidei,  
ad dispellendas in gravissimis quibusque negotiis  
occur.



occurrentium tenebras difficultatum. Vel ex ipso  
sui ethymo vocabuli, plusquam claram esse cuius  
necessum est, *Æcumenici*, id est *Vniversalis*, ra-  
tionem Concilii, in quo & ad universa, & ex u-  
niversis Regnis, Gentibus, ac Provinciis, Mysteri-  
orum DEI explicanda Arcana, ad defendendam  
Ecclesiam, ad avertendos, eliminandosque errores,  
clarissimi quique, autoritate, prudentiâ, sapientiâ,  
congregantur Viri, nec solum Ecclesiasticis ful-  
gentes dignitatibus, etiam sæculi præditi poten-  
tiâ suprema interdum & maiestate. Quid augu-  
stius æquè ac sanctius videas sub sole, quam gra-  
vissimos illos Senatus Ecclesiæ, ipsis etiam orbis  
stipatos & adorandos Principibus, regalibus ac Im-  
peratoriiis subnixos solis; illa summorum veneran-  
da Patrum, Sacrorum purpurata Antistitum, lectis-  
simorum togata Doctorum Nomina ac Numina!  
Angelicos tot terrarum Spiritus, distinctissimos sex-  
centis agminibus in unitate fidei Quirites! asse-  
rentes quæquè altissima, definientes difficillima,  
convellentes erronea, resolventes dubia, noxia  
præcavent. Quid divinius, quàm adoranda illa  
audire Oracula! illam Orthodoxarum veritatum  
detonantem videre Scholam, illa Castra DEI lectis-  
sima sanctissimaquè, Militantis Antesignanos Ec-  
clesiæ, pro DEO, pro veritate decertantes. Placet  
jam tantorum Capitolium subire Caput? tanto-  
rum syllabum relegere Nominum? Divinissimum  
mecum cernite Aquinatem. Videbitis in eo vel  
de una sua Comitum de Aquino Domo integra  
Principum orbis Comitia; Videbitis extra Nicæ-  
am verissimos in Fridericis secundis Constantinos,



extra Lugdunum in Henricis sextis Carolos, extra  
Tridentum & Lateranum integram Patrum Eccle-  
siam, plenas Doctorum ex Vniverſo Vniuerſitates.  
Nuſquam ſeſe maięſtuoſius meliusquę tota ferę uni-  
verſalis Eccleſię repręſentavit Facies, totus tam  
ſanctus & eruditus congregavit Senatus, tam va-  
ſta Sapientum, pręminentium ex orbe coegit &  
ſtupuit Frequentia, quām in THOMA, humana-  
rum Divinarumque ſcientiarum Angelico Magi-  
ſtro, ſenſuum pro Fide, pro DEO Catholicorum  
invictiſſimo Aſſertore, Divino non Doctore ſed O-  
raculo. Sive enim profanas naturalis Philoſophię  
ad diſputandos Gentiles velimus facultates? hic  
clarior quam in Stagyra Ariſtoteles, divini-  
or quam ſua in ſtoa Plato, eruditior quām in Tuſcu-  
lo ſuo veteriq; Roma Tullius. Sive Chriſtiana  
pręſtantiſſimos Pallade, ad promovenda propa-  
gandaquę Orthodoxa dogmata, per primas Vni-  
verſitates conquiramus Magiſtros? hic celeberr-  
mus extra Athenas Dionyſius, diviniſſimus extra  
Alexandriam Clemens, fortiſſimus extra Romam  
Columna Ægidius, extra Pariſios Albinus, extra  
Lugdunum Beda & Iſidorus, hic lectiſſima Do-  
ctorum orbis Vniverſitas, Vniverſitatum Flos &  
Collegium Nobiliſſimum. Sive ad confutandos  
heterodoxos, ad convincendas proſtigandasq; hę-  
reſes, DEO pro DEO armatos accenſosquę in-  
tueamur Patres? in THOMA, Ignatius & Tertul-  
lianus triumphant de Sabelliis, Athanaſius & Hila-  
rius palmas referunt de Arianis, Nazianzenus &  
Baſilius proſternunt Eunomianos, Cyrillus & E-  
piphanius admirandę ſubigunt Neſtorium, inte-  
gra



gra hærescon omnium frangunt castra. In THOMA, Aurelius Augustinus ferreus Pelagianis, mel-  
leus Ambrosius amarus Manichæis; Maximus  
Martyr Gigas in Monotelitas, Fulgentius fulgur  
& fulmen semi-Arianis. Seu in Jovinianos de-  
sideres Hieronymum, seu in Novatianos Cypria-  
num, in semi-Pelagianos Prosperum, contra Ico-  
nomachos Damascenum, contra Græcos Antel-  
mum, uno omnes in THOMA vel redivivi, vel  
diviniori quadam transformati metamorphosi, or-  
bem sui admiratione attonant, Ecclesiam mire tu-  
entur ab hæresibus. In THOMA universim vi-  
deas Sanctissimos illos Patres, Doctissimos & ze-  
lantissimos pro Religione & Fide Præsules, quot-  
quot vel Nicææ Divinitatem Verbi, vel Con-  
stantinopoli Ephesiquè Deitatem Spiritûs, vel ali-  
bi Divorum omnium sacris in Imaginibus inte-  
meratum cultum, fædis vindicarunt ab erroribus,  
à blasphema defenderunt impietate; quotquot Chal-  
cedone proscripserunt Eutychen, Florentiæ convi-  
cerunt & ad unionem Fidei adduxerunt Græcos,  
Tridenti Lutheranismum, Calvinismum, Jansenis-  
mum; totque cælo adversos orco devoverunt er-  
rores, sanctissimas Christianæ Fidei & vitæ regu-  
las formaverunt. His enim singulis ac universis  
Aquinas Divinissimus, vel lumen adiecit ad cla-  
ritatem ut Sol Doctorum, vel robur ad firmita-  
tem ut inconcussæ veritatis adamas & Magister  
invictissimus, vel inspiravit sensum ad intelligen-  
tiam, ut cælestis quidam Ecclesiæ Spiritus, de An-  
gelico Prædicatorum Ordine Angelicissimus, ve-  
rusque Angelus; ut iam citra paradoxum, cuiquè



manifestum esse debeat, tam integra Ecclesiæ Con-  
cilia commigrasse in THOMAM, quam THO-  
MAM unum omnium esse Comitium, beneque  
Æcumenicum Vniuersalis Concilium Ecclesiæ.  
Quippe si hæc de Viris magnis existimatio est,  
ut unus plurimorum loco habeatur; si illud E-  
thnicæ cæcitatæ lumen, profanæ Præceptor Philo-  
sophiæ Zeno, amplissimæ scholæ instar & specta-  
culi esse meruit Antigono, id de eo ingeminanti  
identidem: *Quale theatrum amisi!* Si Athenien-  
sibus Solon vir eruditissimus, integræ instar Na-  
tionis visus fuit: *Omnia viso Solone conspexisti, hoc  
sunt Athenæ, hoc Græcia.* Si de Orientalium il-  
lo sole, Cæsariensis Phænomeno Cathedræ, Di-  
vo Basilio, is Leonis Magni sensus erat: *Unus  
omnium loco sufficit ad comparandam scientiam;* Quid  
ni & tanto magis Divinissimo Aquinati Nostro  
eam attribuamus gloriam, cum ad meritam sibi  
Panegyrim titulum, ut plurimorum loco & no-  
mine præstantissimorum in Ecclesia asseratur, ut  
mecum, ab omnibus unus dicatur, celebre quod-  
dam & Æcumenicum Ecclesiæ Concilium. Hoc  
de illo affirmasse eruditum Gennadii videtur ef-  
fatum: *Si quis Thomæ libris animum applicuerit, e-  
um nullo alio indigere puto.* Hoc Principum Elogi-  
astes summarie innuisse putatur: *Didicit omnes,  
qui THOMAM intelligit;* Hoc ipsum vel ve-  
ritati inimica acclamavit hæresis Buceri: *Tolle  
THOMAM, & dissipabo Ecclesiam;* ac si dixis-  
set expressius, Doctrina THOMÆ sensus est Ec-  
clesiæ, mens Patrum, non privata Doctoris cu-  
juspîam, sed publica & communis omnium sen-  
tentia,



tentia, non privatum responsum, sed Concilii ortho-  
doxi oraculum; Vt si hic unus vacillet, Vniver-  
salis facile vacillet Ecclesia, *Tolle THOMAM*  
*& dissipabo Ecclesiam.* Tantus nempe in hæreses  
videtur THOMAS, quanta hoc tempore Eccle-  
sia, ipso excepto Capite; tanta suis in assertis &  
resolutionibus Ecclesia, quantus THOMAS, illi-  
us Cor & Anima, doctrinæ Sol, regula verita-  
tum. Talem tantumque sensit, vel se in THO-  
MA melius comprehendere voluit, Æcumenicus il-  
le Patrum Senatus, ubi centeno ore divinæ illius  
acclamavit Sapientiæ: *Ad Doctorem Angelicum,*  
*si quid controversiæ exortum fuerit, communibus vo-*  
*tis referendum.* Nempe Aquinatem Nostrum, il-  
lud esse in Christianitate grande Columnen iudica-  
vit, quo Domus Domini, quo Divini Maiestas  
honoris, quo Divorum Aræ, quo Sacri Religio-  
forum fulciuntur Cætus; Illud probavit Cor, à cu-  
ius Sapientiæ, virtutis & doctrinæ influxu, mili-  
tans Ecclesia, ad prælia Domini contra hostes a-  
nimatur, sanam Caput orbis mentem, omnes re-  
gnorum venæ robur, corporis orthodoxi membra  
vitales spiritus hauriunt ac derivant; Illum in-  
digitavit Solem, qui ortum fidei, diem Atticis no-  
ctibus, meridiem veritati, noctem hæresibus in-  
ducit & occasum; Illam ostendit anchoram, quâ  
navis Petri, spes publicæ, salus universorum, ne  
in scyllas errorum incidant inter turbulentos secta-  
riorum motus feliciter diriguntur; Illam demon-  
stravit regulam, quam sequens non devias, quam  
cogitans non erras, tenens non corruis, discens non  
falleris, loquens infallibilem promulgas veritatem.

Concil:  
Trident

C

Verbo



Verbo, illam conclusit sapientum Vniversitatem; salutarium consiliorum Curiam, illustriorum Doctorum oraculum, Divinorum Arcanorum definitorium, sanctissimorum officinam Canonum, quibus proscribantur hæreses, evitentur errores, teneatur Fides, tota ritè formetur Christianitas; ut extra omnem arrogantiae notam Doctor Divinissimus vel unus Æcumenicum quoddam & probatissimum Ecclesiæ colatur ac adoretur Concilium. Nec nomen illi inane, aut eò maior titulus ejusmodi; obsecro mecum amplius naturam Concilii ex suo ad quem specialiter convocatur fine, perpendite AA. Nonné hic est? ut exorientibus occurratur hæresibus, dubiis Fidei satisfiat, morum consulatur rectitudini, controversiis, obiectionibusq; & conveniens detur campus, & certa ac infallibilis resolutio. Jam quantus Orbem Christianum ante THOMAM inuaserat turbo errorum! quanta hæresum diversas per Provincias, per sæcula succreverant monstra! Alii duo rerum adstruebant principia cum Manichæo & Marcione; alii Trinitatem Personarum tollebant cum Noetio, & Photino; alii phantasticum Christo corpus tribuebant cum Saturnianis & Gnosticis, veram adimebant Divinitatem cum Ebione & Ario; alii impugnabant Sanctos cum Zvinglio, DElparam cum Nestorio, Petri Principatum cum Vicleffo; hi invehebantur in gratiam cum Pelagio, illi in liberum arbitrium cum Calvino; Aliis Eucharestia non placuit cum Berengario, Baptismus cum Flagellantibus, Beatitudo unica visa in terris cū Epicuro & Begvardis. Quot hic requirebantur  
scho-



scholæ! quot Sanctiores Magistri, ad multiplicata adeo, tam extremè Fidei & Sanctitati adversa dedocenda dogmata! quot & quanti in monstra ejusmodi prodire debebant Alcida! quot ad tantas simul illuminandas noctes elucere Soles! sed prodivit THOMAS, unus sufficiens omnibus; prodivit, qui unus audire cælitus meruerat, bene se de DEO scripsisse, & proscripsit, pessimè sentientium greges integros; prodivit unum Doctorum Caput, & acephalas reddidit tot capitum hæreses; prodivit sapientiæ cælestis & sanctitatis ingens theatrum, & personata ad ignominiam detexit scelera; prodivit celebre Ecclesiæ, virtutum simul & scientiarum omnium Concilium, & incredibili efficacia, veriùs Divino quodam Numine demonstravit errores, & damnavit; evocavit hæreses, & convicit; indigitavit veritatem, & firmavit; morum proposuit regulas, & reformavit. Evolvite auro gemmisquè pensanda æquè sanctissima ac sapientissima Aquinatis Divinissimi opera & gesta, illos inexhaustos sapientiæ & probitatis fontes, pretiosa orthodoxo orbi æraria, illos sanctissimos vitæ Christianæ Canones, dicam veriùs sacrosancta æcumenici acta Concilij. Scripsit volumina, ut in crassa caligine & in umbra mortis sedentibus, lumina præberet clarissima ad semitas justitiæ decurrendas: Composuit Corpus, ut publicæ salutis Animam conservaret Religionem; Disposuit sectiones, ut sectas & scissa corda schismate ad unionem Fidei revocaret; Respondit objectis, ut arcana cælestia declararet. Et certè quotquot THOMÆ



legeris argumenta, tot Superum crede effata; quot  
 Articulos, tot fidei indices, vel Numinis oracula,  
 quot objectiones, tot obices erroribus. Quid  
 denique Theologici THOMÆ Tractatus, quam  
 inconcussa fidei dogmata, Corollaria symbola;  
 quæstiones Canones orthodoxi, quodlibet Ca-  
 put mens DEI, sensus Ecclesiæ, oraculum sapi-  
 entum; Summa Angelica orthodoxarum summa-  
 rium veritatum, syllabus Doctorum, Congeries  
 Patrum; ut in uno Authore THOMA non  
 privatam, sed publicam Concilij intelligamus au-  
 thoritatem. Possem ego (quod vel unicum satis es-  
 set ad robur argumenti) vel ex ipso domestico  
 Aquinati Sacratissimo Prædicatorum Ordine, sa-  
 crum ac Sapientissimum ejusmodi Senatum, sole  
 clariùs demonstrare, in THOMA numerosissi-  
 mè congregatum, ex quatuor Summis Pontifici-  
 bus, sexaginta duobus Cardinalibus, viginti qua-  
 tuor Patriarchis, centum triginta octo ArchiPræ-  
 sulibus, octingentis propè Episcopis, supra qua-  
 dringentis Sacri Palatii Magistris, ex librorum  
 Authoribus, ac solius THOMÆ explanatoribus  
 plusquam mille ducentis quinquaginta, ex Do-  
 ctoribus, Theologis, Prædicatoribus Generalibus  
 planè innumeris: sed ad ejusmodi elogium ipse  
 sibi vel unicus sufficit THOMAS. Quid, si  
 vitæ sanctimoniam in illo observaremus? hæc  
 sola vel unica Illum sacrosanctum esse promul-  
 garet Concilium, cuius thaumaturga fides sym-  
 bolum posset esse universæ Christianitati, illiba-  
 ta morum innocentia regula iustitiæ, Angelica  
 modestia norma probitatis, probitas virtutum  
 magi-

Thomas  
 Malvenda  
 Tomo I no



magistra; virtus quælibet canon perfectionis.  
 Verum tantam cælestium charismatum eminenti-  
 am, tam augustam sanctissimarum dotum maje-  
 statem angusti scholasticæ svadæ non capiunt li-  
 mites; Aris celebrandam, sideribus relinquo at-  
 tollendam. Vos jam video scholasticum No-  
 strum in THOMÆ encomium tacita mente  
 approbatis A.A. Vnum ad prærogativam Æ-  
 cumenici universalis Ecclesiæ Concilii, THOMÆ  
 tribuendam, restat promulgandum. Sapientissimi  
 ex testimonio Sacratæ: *Regula jubet Ecclesia-*  
*stica, ut Concilia præter sententiam Romani Pontifi-*  
*cis non celebrentur.* Supremus Ecclesiæ Arbiter  
 Paschalis legem ponit: *Ut omnia Concilia per*  
*Romani Pontificis Authoritatem fiant & robur ac-*  
*cipiant.* Ergo præter Summi secundum ordinem  
 Melchisedech Pontificis ex crucis Cathedra ap-  
 probantis Doctrinam THOMÆ, supremorum  
 Ecclesiæ Caput faventissimam de Nostro A-  
 quinate auscultate mentem & iudicium. Au-  
 dietis VII. ab ore Clementis in eius elogia  
 Pontificiæ oracula Cathedræ: *THOMAS*  
*Angelicus, vivus Mentis Divinæ Interpres adore-*  
*tur.* Audietis sexcenta alia Romanæ Sedis effa-  
 ta, celeberrimæ Illius acclamantia Doctrinæ: Il-  
 lam Urbanus IV. *Catholicam, veridicam, admi-*  
*randam, Universalem Ecclesiam illustrantem;* Illam In-  
 nocentius VI. *præ cæteris, excepta Canonica, haben-*  
*tem proprietatem verborum, modum dicendorum, ve-*  
*ritatem sententiarum;* Illam Clemens VIII. *Cælestem,*  
 Alexander VII. *inconcussam, tutissimam;* Illam de-  
 niquè *sequendam ab omnibus* Clemens VI. decla-

Historic.  
 Eccles.  
 sæculo 5.

Canus.

D

ravit.



ravit. Prætereo Pii V. Joannis XXII. Urban  
V. Sixti V. Benedicti XIII. totquè aliorum  
Pontificum Constitutiones, quibus Aquinas  
Divinissimus summè extollitur, maximè o-  
mnibus commendatur; Nil superest, nisi ut  
subscribatur illi ab omnibus, quod ut hac-  
tenus Oratoria deduxi Panegyri, ita ad  
Theologicas Speculativo Dogmaticas de-  
scendens Conclusiones, ut rem Do-  
gmaticæ maximè necessariam ma-  
teriæ, Æcumenicum Ecclesiæ Con-  
cilium THOMAM assero,  
pro prima omnium ob o-  
culos pono Authoritate.

Dixi.





# CONCLVSIONES THEOLOGICÆ

SCHOLASTICO DOGMATICÆ

*Juxta Mentem S. THOMÆ Aqu: Angelici Ecclesiæ  
DOCTORIS,*

EX TRACTATV

## DE SS: TRINITATE.

I.



atur in DEO vera Trinitas Personarum, potestq; à Theologo positivè probari, & negative demonstrari.

II:

EX Personis Divinis necessariò est una improducta, & duæ productæ ac procedentes, adeoq; datur in DEO vera & realis ad intra Processio Personarum.

III.

PRincipium quo tam radicale, quam formale processionum Divinarum non est Essentia Divina ut præcisa ab intellectu & voluntate, sed nec ulla perfectio absoluta.

IV.

ETiam relationes Paternitatis & spirationis, non sunt aliquæ formæ constitutivæ sive proximè sive remotè, etiam inadæquatè Personæ producentis ut talis.

V.

ESsentia ut modificata relatione est principium quo radicale; proximum verò & formale principium Generationis est intellectus pariter ut modificatus Paternitate, & spirationis voluntas ut modificata relatione spiratoris.

VI.

VERbum Divinum per se & formaliter procedit ex co-  
gnitione non solum essentiæ, sed etiam attributorum, o-



mniumq; Personarum, & possibilium creaturarum; ex cognitione verò creaturarum actualium, tam futurarum quam existentium procedit solum concomitanter & per accidens.

VII.

**S**piritus Sanctus non est aliqua mera Virtus DEI, sed vera Persona Divina verusq; DEVS. Tam à Patre quam à Filio procedit, solum tamen ut ab uno principio.

VIII.

**V**ox Filioq; jure addita est symbolo Constantinopolitano. Idq; probabilius primum in Hispanijs in fine sæculi VI. tum in Germania & Gallia sæculo VIII. Romæ sæculo IX. & demum in tota Ecclesia sæculo XIII.

IX.

**S**piritus Sanctus si non procederet à Filio, non distingueretur realiter ab illo.

X.

**D**atur vera & propria ratio Personæ in DEO.

XI.

**F**ormale & adequatum significatum Personæ in DEO non est sola incommunicabilitas, sed relatio sub munere subsistendi per se incommunicabiliter; significatum verò materiale directum est relatio sub munere referendi, indirectum Natura Divina cum cæteris absolutis.


XII.

**P**ersonæ Divinæ constituuntur formaliter relationibus sub munere formæ hypostaticæ; in esse tamen, Patris, Filij, & Spiritûs sancti, iisdem relationibus sub munere formæ relativæ; perfectio autem absoluta tantum se habet de materiali.


*Ad Majorem Nominis D E F Sanctificationem*













22000,-

3.XII.13



**Bibliotheca**  
**P.P. Camaldulensium in Bielany**

Depozyt w Bibliotece Jagiellońskiej



02350



